



劉隨州集卷第三

七言古詩

觀李湊所畫美人障子

愛爾含天姿丹青有殊智無間已得象象外
更生意西子不可見千載無重還空令浣沙
態猶在含毫間一笑豈易得雙蛾如有情窻
風不舉袖但覺羅衣輕華堂翠幕春風來內
閣金屏曙色開此中一見亂人目只疑行到
雲陽臺



江樓送太康郭主簿赴嶺南

良

對酒憐君安可論當官愛士如平原料錢用
盡却為謗食客空多誰報恩萬里孤舟向南
越蒼梧雲中暮帆滅樹色應無江北秋天涯
尚見淮陽月驛路南隨桂水流猿聲不絕到
蠻州青山落日那堪望誰見思君江上樓

客舍喜鄭三見寄

客舍逢君未換衣閉門愁見桃花飛遙想故
園今已爾家人應念行人歸寂寞垂陽映深

曲長安日暮靈臺宿窮巷無人鳥雀閑空庭
新雨莓苔綠此中分與故交踈何幸仍廻長
者車十年未稱平生意好得辛勤謾讀書

送賈三北遊

賈生未達猶窘迫身馳疋馬邯鄲陌片雲郊
外遙送人斗酒城邊暮留客顧予他日仰時
髦不堪此別相思勞雨色新添漳水綠夕陽
遠照蘇門高把袂相看衣共緇窮愁只是惜
良時亦知到處逢下榻莫滯秋風西上期

齊一和尚影堂

一公住世忘世紛暫來復去誰能分身寄虛
空如遇客心將生滅是浮雲蕭散浮雲往不
還淒涼遺教歿仍傳舊地愁看雙樹在空堂
只是一燈懸一燈長照恒河沙雙樹猶落諸
天花天花寂寂香深殿苔蘚蒼蒼闕虛院昔
余精念訪禪扉常接微言清道機今來寂寞
無所得惟共門人淚滿衣

潁州留別司倉李萬

故人早負干將器誰言未展平生意想君疇
昔高步時肯料如今折腰事且知投刃皆若
虛日揮案牘常有餘槐暗公門趨小吏荷香
陂水膾鱸魚客裏相逢款話深如何岐路剩
霜襟白雲西上催歸念潁水東流是別心落
日征驂隨去塵含情揮手背城闈已恨良時
空此別不堪秋草更愁人

聽笛歌

舊遊憐我長沙謫載酒沙頭送遷客天涯望

月自沾衣江上何人復吹笛橫笛能令孤客
愁綠波淡淡如不流商聲寥亮羽聲苦江天
寂歷江楓秋靜聽關山聞一叫三湘月色悲
猿嘯又吹揚柳激繁音千里春色傷人心隨
風飄向何處落唯見曲盡平湖深明發與君
離別後馬上一聲堪白首

時平後送范倫歸安州

時聞戰罷圖麟閣破虜收兵卷戎幕滄海初
看漢月明紫微已見胡星落憶昔扁舟此南

渡荆棘煙塵滿歸路與君攜手姑蘇臺望鄉
一日登幾迴白雲飛鳥去寂寞吳山楚岫空
崔嵬事往時平還舊丘青青春草近家愁洛
陽舉目今誰在潁水無情應自流吳苑西人
去欲稀留連一日空知非江潭歲盡愁不盡
鴻鴈春歸身未歸萬里遙懸帝鄉憶五年空
帶風塵色却到長安逢故人不道姓名應不
識

小鳥篇上裴尹

藩籬小鳥何其微翩翩日夕空此飛只緣六
翻不自致長似孤雲無所依西城黯黯斜暉
落衆鳥紛紛皆有託獨立雖輕鷺雀群孤飛
還懼鷹鷂搏自憐天上青雲路弔影徘徊獨
愁暮銜花縱有報恩時擇木誰容托身處歲
月蹉跎飛不進羽毛顛頓何人問遶樹空隨
鳥鵲驚巢林只有鷦鷯分主人庭中蔭喬木
愛此清陰欲棲宿少年挾彈遙相猜遂使驚
飛往復迴不辭奮翼向君去唯怕金丸隨後

來

登吳古城歌

登古城兮思古人感賢達兮同埃塵望平原
兮寄遠目歎姑蘇兮聚麋鹿黃池高會事未
終滄海橫流人蕩覆伍員殺身誰不冤竟看
墓樹如所言越王嘗膽安可敵遠取名田何
所益一朝空謝會稽人萬古猶傷甬東客黍
離離兮城坡地牛羊踐兮牧豎歌野無人兮
秋草綠園爲墟兮古木多白楊蕭蕭悲故柯

3
2

应为又 P4

黃雀啾啾爭晚禾荒阡斷兮誰重過孤舟逝
兮愁若何天寒日暮江楓落葉去辭風水自
波

疲兵篇

驕虜乘秋下薊門陰山日夕煙塵昏三軍疲
馬力已盡百戰殘兵功未論陣雲決莽屯塞
北羽書紛紛來不息孤城望處增斷腸折劍
看時可露臆元戎日夕且歌舞不念關山久
辛苦自矜倚劍氣凌雲卻笑聞笳淚如雨萬
里飄飄空此身十年征戰老胡塵赤心報國
無片賞白首還家有幾人朔風蕭蕭動枯草
旌旗獵獵榆關道漢月何曾照客心胡笳只
解催人老軍前仍欲破重圍閨裏猶應愁未
歸小婦十年啼夜織行人九月憶寒衣飲馬
淖河晚更清行吹羌笛遠歸營只恨漢家多
苦戰徒遺金鏃滿長城

新安送陸農歸江陰

新安路人來去早潮復晚潮明日知何處潮

水無情亦解歸自憐長在新安住

弄白鷗歌

泛泛江上鷗毛衣皓如雪朝飛瀟湘水夜宿
洞庭月歸客正夷猶愛此滄江閒白鷗

長沙贈衡岳祝融峯般若禪師

般若公般若公負鉢何時下祝融歸路却看
飛鳥外禪房空掩白雲中桂花寥寥閑自落
流水無心西復東

贈湘南漁父

問君何所適暮暮逢煙水獨與不繫舟往來
楚雲裏釣魚非一歲終日只如此日落江清
桂檝遲纖鱗百尺深可窺沉鈎垂餌不在得
白首滄浪空自知

明月灣尋賀九不遇

楚水日夜綠傍江春草滋青青遙滿目萬里
傷心歸故人川上復何之明月灣南空所思
故人不在明月在誰見孤舟來去時

題曲阿三昧王佛殿前孤石

孤石自何處對之疑舊遊
氛氲峴首夕蒼翠
剡中秋迥出群峰當殿前
雪山靈鷲慙貞堅
一片孤雲長不去
莓苔古色空蒼然

送友人東歸

對酒灞亭暮相看愁自深
河邊草已綠此別
難為心關路迢迢
足馬歸垂楊
寂寂數鶯飛
憐君獻策十餘載
今去猶為一布衣

入桂渚次砂牛石穴

扁舟傍歸路日暮瀟湘深
湘水清見底楚雲
澹無心片帆落桂渚
獨夜依楓林
楓林月出
猿聲苦桂渚天寒
桂花吐此中無處不堪愁
江客相看淚如雨

嚴陵釣臺送李康成赴江東使

潺湲子陵瀨鬢髮如在目
七里人已非千年
水空綠新安江上孤帆遠
應逐楓林萬餘轉
古臺落日共蕭條
寒水無波更清淺
臺上漁竿不復持
却令猿鳥向人悲
灘聲山翠至今
在遲爾行舟晚泊時

送姨子弟往南郊

一展慰久闊寸心仍未伸別時兩童稚及此
俱成人那堪適會面遽已悲分首客路向楚
雲河橋對衰柳送君匹馬別河橋汝南山郭
寒蕭條今我單車復西上郎去灞陵轉惆悵
何處共傷離別心明月亭亭兩鄉望

銅雀臺

嬌愛更何日高臺空數層含啼映雙岫不忍
看西陵漳河東流無復來百花輦路爲蒼苔
清樓月夜長寂寞碧雲日暮空徘徊君不見
鄴中萬事非昔時古人不在今人悲春風不
逐君王去草色年年舊宮路宮中歌舞已浮
雲空指行人往來處

王昭君歌

自矜嬌艷色不顧丹青人那知粉繪能相負
却使容華翻誤身上馬辭君嫁驕虜玉顏對
人啼不語北風鴈急浮雲秋萬里獨見黃河
流纖腰不復漢宮寵雙蛾長向胡天愁琵琶

絃中苦調多蕭蕭
羌笛聲相和誰憐一曲傳
樂府能使千秋傷綺羅

送杜越江佐覲省往新安江

去帆楚天外望遠愁復積
想見新安江扁舟
一行客清流數千丈
底下看白石色混元氣
深波連洞庭碧鳴榔去未已
前路行可覲猿
鳥悲啾啾杉松雨聲夕
送君東赴歸寧期
新安江水遠相隨見
說江中孤嶼在此行
應賦謝公詩

湘中憶歸

終日空理棹經年猶別家
頃來行已遠彌覺
天無涯白雲意自深
滄海夢難隔迢遞萬里
帆飄颻一行客獨憐
西江外遠寄風波裏
平湖流楚天孤鴈渡
湘水湘流澹澹空
愁子猿啼啾啾滿
南楚扁舟泊處聞
此聲江客相看
淚如雨

送郭六侍從之武陵郡

常愛武陵郡羨君將遠尋
空憐世界迫孤負

桃源心洛陽遙想桃源隔野水閑流春自碧
花下常迷楚客船洞中時見秦人宅落日相
看斗酒前送君南望但依然河梁馬首隨春
草江路猿聲愁暮天丈人別乘佐分憂才子
趨庭兼勝遊澧浦荆門行可見知君詩興滿
滄洲

山鸚鵡歌

山鸚鵡長在此山吟古木嘲哢相呼響空谷
哀鳴萬變如成曲江南逐臣悲放逐倚樹聽
之心斷續巴人峽裏自聞猿燕客水頭空擊
筑山鸚鵡一生不及雙黃鵠朝去秋田啄殘
粟暮入寒林嘯群族鳴相逐啄殘粟食不足
青雲杳杳無力飛白露蒼蒼抱枝宿不知何
事守空山萬壑千峰自愁獨

望龍山懷道士許法稜

心惆悵望龍山雲之際鳥獨還懸崖絕壁幾
千丈綠蘿嫋嫋不可攀龍山高誰能踐靈原
中蒼翠晚嵐煙瀑水如向入終日迢迢空在

眼中有一人披霓裳誦經山頂餐瓊漿空林
閑坐獨焚香真官列侍儼成行朝入青霄禮
玉堂夜掃白雲眠石牀桃花洞裏居人滿桂
樹山中住日長龍山高高遙相望

戲贈干越尼子歌

鄱陽女子年十五家本秦人今在楚厭向春
江空浣紗龍宮落髮披架裳五年持戒長一
食至今猶自顏如花亭亭獨立青蓮下忍草
禪枝繞精舍自用黃金買地居能嫌碧玉隨
人嫁北客相逢疑姓秦鉛華拋卻仍青春一
花一竹如有意不語不笑能留人黃鸝欲栖
白日暮天香未散經行處却對香爐閑誦經
春泉漱玉寒冷冷雲房寂寂夜鍾後吳音清
切令人聽人聽吳音歌一曲杳然如在諸天
宿誰堪世事更相牽惆悵迴船江水綠

劉隨州集卷第四

五言律詩

碧澗別墅喜皇甫侍郎相訪

荒村帶返照落葉亂紛紛古路無行客寒山
獨見君野橋經雨斷澗水向田分不為憐同
病何人到白雲

初到碧澗招明契上人

漸老知身累初寒曝背眠白雲留來日黃葉
減餘年猿護窓前樹泉澆谷後田沃洲能共

隱不用道林錢

送少微上人遊天台

石橋人不到獨往更迢迢
乞食山家少尋鍾
野路遙松門風自掃
瀑布雪難銷
秋夜聞清梵
餘音逐海潮

却歸睦州至七里灘下作

南歸猶謫宦獨上子陵灘
江樹臨洲晚沙禽
對水寒山開斜照
在石淺亂流難
惆悵梅花發
年年此地看

對酒寄嚴維

陋巷喜陽和衰顏對酒歌
懶從華髮亂閒任
白雲多郡簡容垂釣
家貧學弄梭
門前七里瀨
早晚子陵過

送裴郎中貶吉州

亂軍交白刃一騎出黃塵
漢節同歸闕江帆
共逐臣猿愁岐路晚
梅作異方春
知己鄮侯在
應憐脫粟人

新年作

鄉心新歲切天畔獨潛然老至居人下春歸
在客先嶺猿同旦暮江柳共風煙已似長沙
傳從今又幾年

朱放自杭州與故里相使君立碑回
因以奉簡吏部楊侍郎製文

片石羊公後淒涼江水濱好辭千古事墮淚
萬家人鵬集占書夕鸞回刻篆新不堪相顧
恨文字日生塵

送宣尊師醮畢歸越

吹簫江上晚惆悵別茅君踏火能飛雪登刀
入白雲晨香長日在夜磬滿山聞揮手桐溪
路無情水亦分

送裴使君赴荆南行軍司馬

盛府南門寄前程積水中月明臨夏口山晚
望巴東故節辭江郡寒笳發渚官漢川風景
好遙羨逐羊公

酬皇甫侍御見寄時前相國姑臧公

初臨郡

離別江南北汀洲葉再黃路遙雲共水砧迥
月如霜歲儉依仁政年衰憶故鄉佇看宣室
召漢法倚張綱

月下呈章秀才

自古悲搖落誰人柰此何夜蛩偏傍枕寒鳥
數移柯向老三
年謫當秋百感多家貧惟好
月空魏子猷過

酬張夏

幾歲依窮海頽年惜故陰劍寒空有氣松老
欲無心翫雪勞相訪看山正獨吟孤舟且莫
去前路水雲深

送李使君貶連州

獨過長沙去誰憑此路愁秋風散千騎寒雨
泊孤舟賈誼辭明主蕭何識故侯漢廷當自
召湘水但空流

秋夜北山精舍觀體如師梵

焚香奏仙唄向夕遍空山清切兼秋遠威儀
對月閑靜分巖響答散逐海潮還業得風吹

去隨人到世間

酬張夏雪夜赴州訪別途中苦寒作
扁舟乘興客不憚苦寒行晚暮相依分江潮
欲別情水聲冰下咽砂路雪中平舊劍鋒鋌
盡應嫌贈脫輕

尋洪尊師不遇

古木無人地來尋羽客家道書堆玉按仙帔
疊青霞鶴老難知歲梅寒未作花山中不相
見何處化丹砂

喜鮑禪師自龍山至

故居何日下春草欲芊芊猶對山中月誰聽
石上泉猿聲知後夜花發見流年杖錫閑來
往無心到處禪

送方外上人之常州依蕭使君

宰臣思得度鷗鳥戀爲群遠客迴飛錫空山
卧白雲夕陽孤艇去秋水兩溪分歸共臨川
史同翻貝葉文

宿北山禪寺蘭若

上方鳴夕磬林下一僧還密行傳人少禪心
對虎閒青松臨古路白日滿寒山舊識窓前
桂經霜更待攀

赴新安別梁侍郎

新安君莫問此路水雲深江海無行跡孤舟
何處尋青山空向淚白日豈知心縱有餘生
在終傷老病侵

江州留別薛六柳八二員外

江海相逢少東南別處長獨行風嫋嫋相去
水茫茫白首辭同舍青山昔故鄉離心與潮
信每日到潯陽

和州留別穆郎中

播遷悲遠道搖落感衰容今日猶多難何年
更此逢世交黃葉散鄉路白雲重明發看煙
樹唯聞江北鍾

和州送人歸郢

因家漢水曲相送掩柴扉故郢生秋草寒江
淡落暉綠林行客少赤壁住人稀獨過潯陽

去潮歸人不歸

送金昌宗歸錢塘

新家浙江上獨泛落潮歸
秋水照華髮涼風生褐衣
柴門嘶馬少藜杖拜人稀
惟有陶潛柳蕭條對掩扉

酬張夏別後道中見寄

離群方歲晏謫宦在天涯
暮雪同行少寒潮欲上
遲海鷗知吏傲沙鶴見人衰
只畏生秋草西歸亦未期

新安奉送穆諭德歸朝

九重宣室召萬里建溪行事直
皇天在歸遲白髮生用材身復起
覩聖眼猶明離別寒江上潺湲若有情

偶然作

野寺長依止田家或往還
老農開古地夕鳥入寒山
書劔身同廢煙霞吏共閑
豈能將白髮扶杖出人間

送州人孫沅自本州却歸句章新營

所居

故里歸成客新家去未安詩書滿榻舍征稅
及漁竿火種山田薄星居海島寒憐君不得
已步步別離難

送李員外使還蘇州兼呈前袁州李

使君

別離共成怨衰老更難忘夜月留同舍秋風
在遠鄉朱絃徐向燭白髮強臨觴歸獻西陵
作誰知此路長

酬李員外從崔錄事載華宿三河戍

先見寄

寒江鳴石瀨歸客夜初分人語空山荅猿聲
獨戍聞遲來朝及暮愁去水連雲歲晚心誰
在青山見此君

見秦系離婚後出山居作

豈知偕老重垂老絕良姻郝氏誠難負朱家
自愧貧綻衣留欲故織錦罷經春何況靡蕪
綠空山不見人

酬秦系

鶴書猶未至那出白雲來舊路經年別寒潮
每日迴家空歸海燕人老發江梅最憶門前
柳閑居手自栽

歲日作

建寅迴北斗看歷占春風律變滄江外年加
白髮中春衣試稚子壽酒勸衰翁今日陽和
發榮枯豈不同

題元錄事開元所居

幽居蘿薜情高卧紀綱行鳥散秋鷹下人閒
春草生冒嵐歸野寺收印出山城今日新安
郡因君水更清

送崔載華張起之閩中

不識閩中路遙知別後心猿聲入嶺切鳥道
問人深旅食過夷落方言會越音西征開幕
府早晚用陳琳

送張司直赴嶺南謁張尚書

番禺萬里路遠客片帆過盛府依橫海荒祠

拜伏波人經秋瘴變鳥墜火雲多誠憚炎州
裏無如一顧何

寄曾稽公徐侍郎

搖落淮南葉秋風想越吟鄒枚入梁苑逸少
在山陰老鶴無衰貌寒松本有心聖朝難稅
駕惆悵白雲深

送朱山人

越州初罷戰江上送歸橈南渡無來客西陵
自落朝空城垂故柳舊業廢春苗閭里相逢
少鶯花共寂寥

秋夜肅公房喜普門上人自陽羨山
至

山棲久不見林下偶同遊早晚來香積何人
注沃洲寒禽驚後夜古木帶高秋却入千峯
去孤雲不可留

送李祕書卻赴南中

卻到番禺日應傷昔所依炎州百口住故國
幾人歸路識梅花在家存棗蓼稀獨逢迴鴈

去猶作舊行飛

過前安宜張明府郊居

寂寥東郭外白首一先生
解印孤琴在移家
五柳成夕陽臨水釣
春雨向田耕終日空林
下何人識此情

使迴次柳楊過元八所居

君家楊柳渡來往落帆過
綠竹經寒在青山
欲暮多薜蘿誠可戀
婚嫁復如何無柰閑門
外漁翁夜夜歌

送李侍御貶郴州

洞庭波渺渺君去弔靈均
幾路三湘水全家
萬里人聽猿明月夜
看柳故年春憶想汀洲
畔傷心向白蘋

寄普門上人

白雲幽卧處不向世人傳
聞在千峯裏心知
獨夜禪辛勤羞薄祿
依止愛閑田惆悵王孫
草青青又一年

逢郴州使因寄鄭協律

相思楚天外夢寐楚猿吟更落淮南葉難爲
江上心衡陽問人遠湘水向君深欲逐孤帆
去茫茫何處尋

岳陽館中望洞庭湖

萬古巴丘戍平湖此望長問人何淼淼愁暮
更蒼蒼疊浪浮元氣中流沒太陽孤舟有歸
客早晚達瀟湘

巡去岳陽却歸鄂州使院留別鄭洵
侍御

何事長沙謫相逢楚水秋暮帆歸夏口寒雨
對巴丘帝子椒漿奠騷人木葉愁誰憐萬里
外離別洞庭頭

夏口送屈突司直使湖南

共悲來夏口何事更南征霧露行人少瀟湘
春草生鸞啼何處夢猿嘯若爲聲風月新年
好悠悠遠客情

雨中過員稷巴陵山居贈別

憐君洞庭上白髮向人垂積雨悲幽獨長江

對別離牛羊歸故道猿鳥聚寒枝明發遙相望雲山不可知

送李中丞之襄州

流落征南將曾驅十萬師罷歸無舊業老去戀明時獨立三朝識輕生一劍知茫茫漢江上日暮復何之

奉使至申州傷經陷沒

舉目傷蕪沒何年此戰爭歸人失舊里老將守孤城廢戍山煙出荒田野火行獨憐潁水

上時亂亦能清

穆陵關北逢人歸漁陽

逢君穆陵路匹馬向桑乾楚國蒼山古幽州白日寒城池百戰後耆舊幾家殘處處蓬蒿遍歸人掩淚看

安州道中經澧水有懷

征途逢澧水忽似到秦川借問朝天處猶看落日邊映沙晴漾漾出澗夜濺濺欲寄西歸恨微波不可傳

步登夏口古城作

平蕪連古堞，遠客此沾衣。
高樹朝光上，空城秋氣歸。
微明漢水極，搖落楚人稀。
但見荒郊外，寒鴉暮暮飛。

贈別盧司直之閩中

爾來多不見，此去又何之。
華髮同今日，流芳似舊時。
洲長春色遍，漢廣夕陽遲。
歲歲王孫草，空憐無處期。

酬郭夏人日長沙感懷見贈

舊俗歡猶在，憐君恨獨深。
新年向國淚，今日倚門心。
歲去隨湘水，春生近桂林。
流鶯且莫弄江畔，正行吟。

赴南巴書情寄故人

南過三湘去，巴人此路偏。
謫居秋瘴裏，歸處夕陽邊。
直道天何在，愁容鏡亦憐。
裁書欲誰訴，無淚可潸然。

餘干旅舍

搖落暮天迥，青楓霜葉稀。
孤城向水閉，獨鳥

背人飛渡口月初上隣家漁未歸鄉心正欲
絕何處搗寒衣

登思禪寺題修竹茂松

上方幽且暮臺殿隱蒙籠遠磬秋山裏清猿
古木中衆溪連竹路諸嶺共松風儻許棲林
下甘成白首翁

勅恩重推使牒追赴蘇州次前溪館
作

漸入雲峰裏愁看驛路閑亂鴉投落日疲馬
向空山且喜憐非罪何心戀末班天南一萬
里誰料得生還

北歸次秋浦界清谿館

萬里猿啼斷孤村客暫依鴈過彭蠡暮人向
宛陵稀舊路青山在餘生白首歸漸知行近
北不見鷓鴣飛

謫官後却歸故林將過虎丘悵然有
作

萬事依然在無如歲月何邑人憐白髮庭樹

長新柯故老相逢少同官不見多唯餘舊山
路惆悵枉帆過

重推後卻赴嶺外待進止寄元侍郎
却訪巴人路難期國士恩白雲從出岫黃葉
已辭根大造功何薄長年氣尚寬空令數行
淚來往落湘沅

劉隨州集卷第四

劉隨集卷第五

五言律詩

秋杪江亭有作

寂寞江亭下江楓秋氣斑世情何處澹湘水
向人閑寒渚一孤鴈夕陽千萬山扁舟如落
葉此去未知還

送鄭司直歸上都

歲歲逢離別蹉跎江海濱宦遊成楚老鄉思
逐秦人馬首歸何日鶯啼又一春因君報情



舊閑慢欲垂綸

送靈澈上人歸嵩陽蘭若

南地隨緣久東林幾歲空暮山門獨掩春草
路難通作梵連松韻焚香入桂叢唯將舊瓶
鉢却寄白雲中

却赴南邑留別蘇臺知己

又過梅嶺上歲歲此枝寒落日孤舟去青山
萬里看猿聲湘水靜草色洞庭寬已料生涯
事唯應把釣竿

長沙桓王墓下別李紆張南史

長沙千載後春草獨萋萋流水朝將暮行人
東復西碑苔幾字滅山木萬株齊佇立傷今
古相看惜解携

和靈一上人新泉

東林一泉出復與遠公期石淺寒流處山空
夜浴時夢閑聞細響慮澹對清漪動靜皆無
意唯應達者知

將赴江南湖上別皇甫曾

此去君何恨南行我更遙東西湖渺渺離別
雨蕭蕭綠水通春谷青山過板橋潯陽如狂
棹千里有歸潮

送李摯赴延陵令

清風季子邑想見下車時向水彈琴靜看山
採菊遲明君加印綬廉使託惇嫠日暮華陽
洞雲峰若有期

奉送裴員外赴上都

彤檐江上遠萬里詔書催獨過潯陽去空憐
潮信迴離心秋草綠揮手暮帆開想見秦城
路人看五馬來

送侯御赴黔中充判官

不識黔中路今看遣使臣猿啼萬里客鳥似
五湖人地遠官無法山深俗豈淳須令荒徼
外亦解懼埋輪

秋日登吳公臺上寺遠眺寺即陳將

明徹戰場吳

古臺搖落後秋日望鄉心野寺來人少雲峯

隔水深夕陽依舊壘寒磬滿空林惆悵南朝
事長江獨至今

淮上送梁二恩命追赴上都

賈生年最少儒行漢庭聞拜手卷黃紙迴身
謝白雲故關無去客春草獨隨君渺渺長淮
水東西自此分

送崔昇歸上都

舊寺尋遺緒歸心逐去塵早鶯何處客古木
幾家人白髮經多難滄洲欲暮春臨期數行
淚爲爾一沾巾

過李將軍南鄭林園觀妓

郊原風日好百舌弄何頻小婦秦家女將軍
天上人鴉歸長郭暮草映大堤春客散垂楊
下通橋車馬塵

送嚴侍御充東畿觀察判官

洛陽征戰後君去問凋殘雲月臨南至霜風
向北寒故園經亂久古木隔鄰看誰訪江城
客年年守一官

送王端公入奏赴上都

舊國無家訪臨岐亦羨歸途經百戰後客過
二陵稀秋草通征騎寒城背落暉行當蒙顧
問吳楚歲頻饑

送營田判官鄭侍御起上都

上國三千里西還及歲芳故山經亂在春日
送歸長繞奏趨雙闕秋成報萬箱幸論開濟
力已實海陵倉

送李校書赴東浙幕府

方從大夫後南去會稽行淼淼滄江外青青
春草生芸香辭職事梅吹聽軍聲應訪王家
宅空憐江水平

清明後登城眺望

風景清明後雲山睥睨前百花如舊日萬井
出新煙草色無空地江流合遠天長安在何
處遙指夕陽邊

陪王明府泛舟

花縣暈琴暇樵風載酒時山含秋色近鳥度

夕陽遲出沒，鳧成浪，蒙龍竹亞枝，雲峯逐人意，來去解相隨。

奉送度支留後若侍御之歙州便赴

信州省覲

國用憂錢穀，朝推此任難。即山榆莢變，降雨稻花殘。林響朝登嶺，江喧夜過灘。遙知驄馬色，應待倚門看。

餘干夜宴奉餞前蘇州韋使君

復拜東陽郡，遙馳北闕心。行春五馬急，向夜一猿深山過。康郎近星看，婺女臨幸容。樓託分猶戀舊棠陰。

晚次苦竹館，卻憶干越舊游。

匹馬風塵色，千峯旦暮時。遙看落日盡，獨向遠山遲。故驛花臨道，荒村竹映籬。誰隣却迴首，步步戀南枝。

送李二十四移家之江洲

煙塵猶滿日，岐路易沾衣。逋客多南渡，征鴻自北飛。九江春草綠，千里暮潮歸。別後難相

訪全家隱釣磯

送盧判官南湖

漾舟仍載酒愧爾意相寬
草色南湖綠松聲小署寒
水禽前後起花嶼往來看
已作滄洲調無心戀一官

送張栩扶持之睦州

遙憶新安舊扁舟復却還
淺深看水石來往逐雲山
入縣餘花在過門故柳閑
東征隨子去皆隱薜蘿間

集梁耿開元寺所居院

到君幽卧處爲我掃莓苔
花雨晴天落松風終日來
路經深竹過門向遠山開
豈得長高枕中朝正用才

贈西隣盧少府

籬落能相近漁樵偶復同
苔封三徑絕溪向數家通
犬吠寒煙裏鴉鳴夕照中
時因杖藜次相訪竹林東

遊休禪師雙峯寺

雙扉碧峰際遙向夕陽開飛錫方獨往孤雲
何事來寒潭映白月秋雨上青苔相送東郊
外羞看駉馬回

雁中見桃花南枝已開北枝未放因

寄杜副端

何意同根本開花每後時應緣去日遠獨自
發春遲結實恩難忘無言恨豈知年光不可
待空羨向南枝

奉送盧員外之饒州

天書萬里至旌旆上江飛日向鄱陽近應看
吳岫微暮帆何處落潮水背人歸風土無勞
問南枝黃葉稀

送處士歸州因寄林山人

陵陽不可見獨徃復如何舊邑雲山裏扁舟
來去過鳥聲春谷靜草色太湖多儻宿荆溪
夜相思漁者歌

移使鄂州次峴陽館懷惟舊居

多慙恩未報敢問路何長萬里通秋鴈千峰

共夕陽舊遊成遠道北去更違鄉草路深山
裏朝朝落客裳

送齊郎中赴海州

華省占星動孤城望日遙直廬收舊草行縣
及新苗滄海天連水青山暮與朝間闔幾家
散應待下車招

重陽日鄂城樓送屈突司直

登高復送遠惆悵洞庭秋風景同前古雲山
滿上游蒼蒼來暮雨渺渺逐寒流今日關中

事蕭何共爾憂

更被奏留淮南送從弟罷使江東

又作淮南客還悲木葉聲寒潮落瓜步秋色
上蕪城王事何時盡滄洲羨爾行青山將綠
水惆悵不勝情

經滌母墓

昔賢懷一飯茲事已千秋古墓樵人識前朝
楚水流渚蘋行客薦山木杜鵑愁春草茫茫
綠王孫舊此遊

送李端公赴東都

軒轅征戰後江海別離長
遠客歸何處平蕪
滿故鄉夕陽帆杳杳
舊里樹蒼蒼惆悵蓬山
下瓊枝不可忘

送王員外歸朝

往來無盡日離別要逢春
海內怪多事天涯
見近臣芳時萬里客
鄉路獨歸人魏闕心常
在隨君亦向秦

送蔣侍御入秦

朝見及芳菲恩榮出紫微
晚光臨仗奏春色
共西歸楚客移家老秦人
訪舊稀因君鄉里
去爲掃故園扉

洞庭驛逢郴州使還寄李湯司馬

洞庭秋水闊南望過衡峰
遠客瀟湘裏歸人
何處逢孤雲飛不定
落葉無去蹤莫使滄浪
叟長歌笑爾容

送舍弟之鄱陽居

鄱陽寄家處自別掩柴扉
故里何人在滄波

孤客稀湖山春草遍雲木夕陽微南去逢迴
鴈應憐相背飛

送裴二十端公使嶺南

蒼梧萬里路空見白雲來遠國知何在憐君
去未迴桂林無落葉梅嶺自花開陸賈千年
後誰看朝漢臺

過桃花夫人廟

寂寞應千歲桃花想一枝路人看古木江月
向空祠雲雨飛何處山川是舊時獨憐春草

色猶似憶佳期

鄂渚送池州程使君

五馬動欲別謝臨川落日蕪湖色空山
梅冶煙江朝通解舍楚老拜戈船風化東南
滿行舟來去傳

送友人西上

羈心不自解有別會沾衣春草連天積五陵
遠客歸十年經轉戰幾處便芳菲想見函關
路行人去亦稀

送梁郎中赴吉州

遙想廬陵郡還聽叔度歌
舊官移上象新令
布中和看竹經霜少
聞猿帶雨多
但愁徵拜
日無柰借留何

過南湖羊處士別業

杜門成白首湖上寄生涯
秋草蕪三徑寒塘
獨一家鳥歸村落盡
水向縣城斜
自有東籬
菊年年解作花

送河南元判官赴河南當苗稅充百

官俸錢

春草長河曲離心共渺然
方收漢家俸獨向
汶陽田鳥雀空城在
榛蕪舊路還
山東征戰
苦幾處有人煙

夏中崔中丞宅見海紅搖落一花獨
開

何事一花殘閒庭百草闌
綠滋經雨發紅艷
隔林看竟日餘香在
過時獨秀難
共憐芳意
晚秋露未須團

使還至菱陂驛渡泚水作

清川已再涉疲馬共西還何事行人倦終年
流水閒孤煙飛廣澤一鳥向空山愁入雲峯
裏蒼蒼閉古關

送齊郎中典括州

星象移河處旌麾獨向東勸耕滄海畔聽訟
白雲中樹色雙溪合猿聲萬嶺同石門康樂
住幾里枉帆通

過隱空和尚故居

自從飛錫去人到沃洲稀林下期何在山中
春獨歸踏花尋舊徑映竹掩空扉寥落東峯
上猶堪靜者依

過蕭尚書故居見李花感而成詠

手植已芳菲心傷故徑微往年啼鳥至今日
主人非滿地誰當掃隨風豈復歸空憐舊陰
在門客共沾衣

送袁處士

閑田北川下靜者去躬耕萬里空江菝孤舟

過郢城種荷依野水移柳待山鶯出處安能
問浮雲豈有情

酬李侍御登岳陽見寄

想見孤舟去無由此路尋暮帆遙在眼春色
獨何心綠水瀟湘闊青山鄂杜深誰當北風
至為爾一開襟

夏口送徐郎中歸朝

星象南宮遠風流上客稀九重思曉奏萬里
見春歸棹發空江響城孤落日暉離心與楊
柳臨水更依依

鄂渚聽杜別駕彈胡琴

文姬留此曲千載一知音不解胡人語空留
楚客心聲隨邊草動意入隴雲深何事長江
上蕭蕭出塞吟

過鸚鵡洲王處士別業

白首此為漁青山對結廬問人尋野笋留客
饋家蔬古柳依沙發春苗帶雨鋤共憐芳杜
色終日伴閒居

寄萬州崔使君

時艱方用武儒者任浮沉
搖落秋江暮隣君
巴峽深立門多白首蜀郡滿青襟
自解書生
詠愁猿莫夜吟

送馬秀才移家京洛便赴舉

自從爲楚客不復掃荆扉
劔共丹誠在書隨
白髮歸舊遊經亂靜後進識君稀
空把相如
賦何人薦禮闈

送南特進赴歸行營

聞道軍書至揚鞭不問家
虜雲連白草漢月到黃沙
汗馬河源飲燒羌隴坻遮翩翩
新結束去逐李輕車

送道標上人歸南岳

悠然倚孤棹卻憶卧中林
江草將歸遠湘山獨往深
白雲留不住淥水去無心
衡嶽千峯亂禪房何處尋

送梁侍御巡來州

蕭蕭江雨暮客散野亭空
憂國天涯去思鄉

歲暮同到時猿未斷迴處水應窮莫望零陵
路千峰萬木中

歲夜喜魏萬成郭夏雪中相尋

新年欲變柳舊客共沾衣歲夜猶難盡鄉春
又獨歸寒燈映虛牖暮雪掩閒扉且莫乘船
去平生相訪稀

送蔡侍御赴上都

遲遲立駟馬久客戀瀟湘明日誰同路新年
獨到鄉孤煙向驛遠積雪去關長秦地看春

色南枝不可忘

晦日陪辛大夫宴南亭

月晦逢休澣年光逐宴移早鶯留客醉春日
爲人遲萸草全無葉梅花遍壓枝政閑風景
好莫比峴山時

送獨孤判官赴嶺

伏波初樹羽待爾靜川鱗嶺海看飛鳥天涯
問遠入蒼梧雲裡夕青草嶂中春遙想文身
國迎舟拜使臣

長沙館中與郭夏對雨

長沙積雨晦深巷絕人幽潤上春衣冷聲連
暮角愁雲橫全楚地樹暗古湘洲杳藹江天
外空堂生百憂

劉隨州集卷第五

